



REPUBLIKA E KOSOVËS/REPUBLIKA KOSOVA

GJYKATA THEMELORE GJAKOVË - DEGA E GJYKATËS RAHOVEC

Numri i lëndës: 2021:170808

Datë: 29.02.2024

Numri i dokumentit: 05391520

C.nr.754/2021

GJYKATA THEMELORE GJAKOVË – DEGA NË RAHOVEC, Departamenti i Përgjithshëm, Divizioni Civil, gjyqtari Avni Berisha, me bashkëpunëtorin profesionale Adelina Çmega, në çështjen juridike kontestimore të paditësve G.R, S.G, N.K dhe S.K-O, të cilët i përfaqëson avokati Z.H nga Rahoveci, sipas autorizimit në shkresat e lëndës, kundër të paditurës Komuna e Rahovecit – Drejtoria Komunale për Arsim, të cilën e përfaqëson avokati B.O nga Rahoveci, sipas autorizimit në shkresat e lëndës, për shkak të kompensimit nga marrëdhënia e punës, vlera e kontestit 11,955.60 euro, jashtë seancës, me datë 29.02.2024, merr këtë:

A K T G J Y K I M

I. APROVOHET NË TËRSI SI E BAZUAR kërkesëpadia e paditësve G.R, S.G, N.K dhe S.K-O.

II. DETYROHET e paditura Komuna e Rahovecit - Drejtoria Komunale e Arsimit, që paditëses G.R, në emër të kompensimit të diferencës së pagës për kualifikim, për periudhën kohore nga data 27.07.2018, e deri me datën 31.12.2022, për 27% të pagës bazë (421.00 euro) x 27% (minusuar 58.32 euro në listën e pagave nga shuma 113.67 euro) = 55.35 euro x 54 muaj, t'ia paguaj shumën prej 2,988.90 euro, të gjitha me kamatë ligjore 8% nga data 27.07.2021 (data e parashtrimit të padisë) e deri në pagesën definitive, të gjitha këto në afat prej 7 ditësh nga dita e marrjes të këtij aktgjykimi, me pasojat ligjore të përmbarimit të detyrueshëm”.

III. DETYROHET e paditura Komuna e Rahovecit - Drejtoria Komunale e Arsimit, që paditësit S.G, në emër të kompensimit të diferencës së pagës për kualifikim, për periudhën kohore nga data 27.07.2018, e deri me datën 31.12.2022, për 27% të pagës bazë (421.00 euro) x 27% (minusuar 58.32 euro në listën e pagave nga shuma 113.67 euro) = 55.35 euro x 54muaj, t'ia paguaj shumën prej 2,988.90 euro, të gjitha me kamatë ligjore 8% nga data 27.07.2021 (data e parashtrimit të padisë) e deri në pagesën definitive, të gjitha këto në afat prej 7 ditësh nga dita e marrjes të këtij aktgjykimi, me pasojat ligjore të përmbarimit të detyrueshëm”.

IV. DETYROHET e paditura Komuna e Rahovecit - Drejtoria Komunale e Arsimit, që paditëses N.K, në emër të kompensimit të diferencës së pagës për kualifikim, për periudhën kohore nga data 27.07.2018, e deri me datën 31.12.2022, për 27% të pagës bazë (421.00 euro) x 27% (minusuar 58.32 euro në listën e pagave nga shuma 113.67 euro) = 55.35 euro x 54muaj, t'ia paguaj shumën prej 2,988.90 euro, të gjitha me kamatë ligjore 8% nga data 27.07.2021 (data e

parashtrimin të padisë) e deri në pagesën definitive, të gjitha këto në afat prej 7 ditësh nga dita e marrjes të këtij aktgjykimi, me pasojat ligjore të përmbarimit të detyrueshëm”.

V. DETYROHET e paditura Komuna e Rahovecit - Drejtoria Komunale e Arsimit, që paditëses S.K-O, në emër të kompensimit të diferencës së pagës për kualifikim, për periudhën kohore nga data 27.07.2018, e deri me datën 31.12.2022, për 27% të pagës bazë (421.00 euro) x 27% (minusuar 58.32 euro në listën e pagave nga shuma 113.67 euro) = 55.35 euro x 54 muaj, t’ia paguaj shumën prej 2,988.90 euro, të gjitha me kamatë ligjore 8% nga data 27.07.2021 (data e parashtrimin të padisë) e deri në pagesën definitive, të gjitha këto në afat prej 7 ditësh nga dita e marrjes të këtij aktgjykimi, me pasojat ligjore të përmbarimit të detyrueshëm”.

VI. DETYROHET e paditura Komuna e Rahovecit – Drejtoria Komunale e Arsimit, që në emër të shpenzimeve të procedurës, paditësve G.R, S.G, N.K dhe S.K-O, t’ia paguajë shumën prej 621.00 euro, në afat prej 7 ditësh nga dita e pranimit të këtij aktgjykimi, me pasojat ligjore të përmbarimit të detyrueshëm.

A r s y e t i m

Paditësit G.R, S.G, N.K dhe S.K-O, përmes përfaqësuesit të tyre të autorizuar, më datën 27.07.2021, në këtë gjykatë ndaj të paditurës Komuna e Rahovecit – Drejtoria Komunale e Arsimit, kanë parashtruar padinë për shkak të kompensimit nga marrëdhënia e punës, vlera e kontestit 11,955.60 euro.

Të njëjti sipas padisë kanë theksuar se janë në marrëdhënie pune tek e paditura në SH.L.P. “7 Shtatori”, në Rahovec. Me parashtresën e datës 02.02.2023 kanë precizuar kërkesëpadinë ku në bazë të Vendimit të Qeverisë së Kosovës, nr.01/33, dhe nenit 7 të Kontratës Kolektive të Arsimit të Kosovës, u takon e drejta e kompensimit në emër të të ardhurave personale në emër të stimulimit për kualifikim, përkatësisht me diplomë universitare 3 dhe 4 vjet prej 27%. Andaj i kanë propozuar gjykatës që padinë dhe kërkesëpadinë ta aprovojë në tërësi si të bazuar.

Shpenzimet procedurale i kanë kërkuar.

E paditura Komuna e Rahovecit – Drejtoria Komunale e Arsimit, në përgjigjen në padi të datës 20.12.2023, ka theksuar se e konteston në tërësi padinë dhe kërkesëpadinë si të pa bazuar. Duke shtuar se e paditura i ka kryer obligimet në kuptim të nenit 7 të KKAK-së, në atë mënyrë që paditësi është paguar në emër të kualifikimit në shumë prej 63.38 euro. Sa i përket Kontratës Kolektive të Arsimit të vitit 2021 MASHTI ka shkëputur këtë kontratë me SBASHK. MASHTI me këtë rast ka theksuar se shkëput kontratën njëanshëm bazuar në kornizën ligjore në fuqi, pasi e njëjta është nënshkruar në mungesë të bazës ligjore. Me rastin e lidhjes së kontratave kolektive në nenin 2 të dy kontratave janë deleguar kompetenca dhe detyrime për të paditurën pa u shoqëruar edhe me buxhet shtesë, këto detyrime nuk janë zbatuar nga niveli qendror i pushtetit. Duke shtuar se kërkesa në kuptim të nenit 87 të Ligjit të Punës, është parashkruar. Andaj i ka propozuar gjykatës që kërkesëpadinë e paditësit ta refuzoj tërësisht si të pa bazuar ndaj të paditurës Komuna Rahovecit.

Shpenzimet e procedurës i ka kërkuar.

Për të vërtetuar gjendjen faktike në mënyrë të plotë dhe të drejtë, gjykata ka bërë administrimin e këtyre provave: kontratën e punës për mësimdhënës e datës 01.09.2015, e lidhur ndërmjet Komunës së Rahovecit – Drejtoria Komunale e Arsimit dhe paditëses G.R; kontratën e punës për mësimdhënës e datës 01.09.2015, e lidhur ndërmjet Komunës së Rahovecit – Drejtoria Komunale e Arsimit dhe paditësit S.G; kontratën e punës për mësimdhënës e datës 02.09.2019, e lidhur ndërmjet Komunës së Rahovecit – Drejtoria Komunale e Arsimit dhe paditëses N.K; kontratën e punës për mësimdhënës e datës 01.09.2018, e lidhur ndërmjet Komunës së Rahovecit – Drejtoria Komunale e Arsimit dhe paditëses S.K; licencën e mësimdhënësit Nr. 100009893; licencën e mësimdhënësit Nr. 100009868; licencën e mësimdhënësit Nr. 100009892; licencën e mësimdhënësit Nr. 100009865; diplomën me numër 1229 e datës 09.03.2018 e lëshuar nga Fakulteti i Edukimit i Universitetit të Prishtinës; diplomën me numër 1332 e datës 14.05.2019 e lëshuar nga Fakulteti i Edukimit i Universitetit të Prishtinës; diplomën me numër 1028 e datës 13.12.2019 e lëshuar nga Fakulteti i Edukimit i Universitetit të Prishtinës; diplomën me numër 408 e datës 27.07.2012 e lëshuar nga Fakulteti i Edukimit i Universitetit të Prishtinës dhe listën e pagave të paditësve për muajin Janar 2022.

Gjykata pasi që bëri vlerësimin e secilës provë veç e veç dhe të gjitha së bashku, mbështetur në dispozitat nga neni 8 dhe 398 të LPK-së, arriti në përfundim se në këtë çështje juridiko-civile duhet vendosur si në dispozitiv të këtij aktgjykimi, pasi që:

Nuk ishte kontestues fakti se paditësit kishin themeluar marrëdhënien e punës me kontratë tek e paditura. Po ashtu nuk është kontestues as fakti se paditësit posedojnë licencë të mësimdhënësit. Në këtë çështje juridike kontestues mbetet fakti se a i takon paditësve kompensimi nga marrëdhënia e punës në bazë të nivelit të shkollimit dhe kualifikimit dhe a është kërkesa e parashkruar.

Me administrimin e kontratës e punës për mësimdhënës e datës 01.09.2015, e lidhur ndërmjet Komunës së Rahovecit – Drejtoria Komunale e Arsimit dhe paditëses G.R, gjykata vërtetoi faktin se paditësja ka kontratë pune me të paditurën dhe e njëjta është e sistemuar në vendin dhe me detyrat e punës në SH.L.P. “7 Shtatori” në Rahovec.

Me administrimin e kontratës e punës për mësimdhënës e datës 01.09.2015, e lidhur ndërmjet Komunës së Rahovecit – Drejtoria Komunale e Arsimit dhe paditësit S.G, gjykata vërtetoi faktin se paditësi ka kontratë pune me të paditurën dhe i njëjti është i sistemuar në vendin dhe me detyrat e punës në SH.L.P. “7 Shtatori” në Rahovec.

Me administrimin e kontratës e punës për mësimdhënës e datës 02.09.2019, e lidhur ndërmjet Komunës së Rahovecit – Drejtoria Komunale e Arsimit dhe paditëses N.K, gjykata vërtetoi faktin se paditësja ka kontratë pune me të paditurën dhe e njëjta është e sistemuar në vendin dhe me detyrat e punës në SH.L.P. “7 Shtatori” në Rahovec.

Me administrimin e kontratës e punës për mësimdhënës e datës 01.09.2018, e lidhur ndërmjet Komunës së Rahovecit – Drejtoria Komunale e Arsimit dhe paditëses S.K, gjykata vërtetoi faktin se paditësja ka kontratë pune me të paditurën dhe e njëjta është e sistemuar në vendin dhe me detyrat e punës në SH.L.P. “7 Shtatori” në Rahovec.

Me administrimin e licencën e mësimdhënësit Nr. 100009893, gjykata vërtetoi faktin se paditësja G.R posedon licencë të llojit “Licencë e Karrierës”.

Me administrimin e licencën e mësimdhënësit Nr. 100009868, gjykata vërtetoi faktin se paditësi S.G posedon licencë të llojit “Licencë e Karrierës”.

Me administrimin e licencën e mësimdhënësit Nr. 100009865, gjykata vërtetoi faktin se paditësja N.K posedon licencë të llojit “Licencë e Karrierës”.

Me administrimin e licencën e mësimdhënësit Nr. 100009892, gjykata vërtetoi faktin se paditësja S.K posedon licencë të llojit “Licencë e Karrierës”.

Me administrimin e diplomës me numër 1229 e datës 09.03.2018 e lëshuar nga Fakulteti i Edukimit i Universitetit të Prishtinës – Qendra në Prizren, gjykata vërtetoi faktin se paditësja G.R ka përfunduar Fakultetin e Edukimit më datën 25.09.2017 dhe mori titullin Bachelor i programit fillor.

Me administrimin e diplomës me numër 1332 e datës 14.05.2019 e lëshuar nga Fakulteti i Edukimit i Universitetit të Prishtinës – Qendra në Prizren, gjykata vërtetoi faktin se paditësi S.G ka përfunduar Fakultetin e Edukimit më datën 24.06.2015 dhe mori titullin Bachelor i Historisë – Edukatës Qytetare.

Me administrimin e diplomës me numër 1028 e datës 13.12.2019 e lëshuar nga Fakulteti i Edukimit i Universitetit të Prishtinës – Qendra në Gjakovë, gjykata vërtetoi faktin se paditësja N.K ka përfunduar Fakultetin e Edukimit më datën 22.02.2014 dhe mori titullin Bachelor i Programit Fizikë - Kimi.

Me administrimin e diplomës me numër 408 e datës 27.07.2012 e lëshuar nga Fakulteti i Edukimit i Universitetit të Prishtinës, gjykata vërtetoi faktin se paditësja S.K ka përfunduar Fakultetin e Edukimit më datën 12.03.2012 dhe mori titullin Bachelor i Biologjisë - Kimisë.

Me administrimin e listës së pagave për muajin janar 2022, gjykata vërtetoi faktin se në muajin janar të vitit 2022, paditësi në këtë periudhë kishin pagën bazë prej 421 euro, ndërsa në emër të kualifikimit iu është paguar shuma prej 58.32 euro.

Kështu, gjykata ka vendosur ta aprovojë kërkesëpadinë e paditësve për shkak se në bazë të Vendimit të Qeverisë së Republikës së Kosovës, me nr.01/33, datë 29.08.2008, në pikën 1. të këtij vendimi përcaktohet që *“nga 1 shtatori 2008 të gjithë mësimdhënësit, drejtorët (zëvendësdrejtorët) dhe bashkëpunëtorët profesional në shkollat e Republikës së Kosovës, do të kenë rritje të pagave të tyre në bazë të kriterëve të licencimit”*. Ndërsa, në pikën 4. të vendimit në fjalë parashihet ngritja e pagës sipas shkallës apo nivelit të kualifikimit ose licencimit, në të cilën përcaktohet se *“mësimdhënësit, drejtorët (zëvendësdrejtorët) dhe bashkëpunëtorët profesional, të pajisur: 1). Me diplomë të Shkollës Normale përfitojnë ngritje të pagës bazë prej 10%; 2). Me diplomë të Shkollës së Lartë Pedagogjike përfitojnë ngritje të pagës bazë prej 19%; 3). Me diplomë universitare 3 dhe 4 vjet përfitojnë ngritje të pagës bazë prej 27% dhe 4). Me diplomë të ciklit të dytë dhe të tretë (Magjistraturë dhe Doktoraturë) përfitojnë ngritje të pagës bazë prej 35%”*. Pra, nga përmbajtja e vendimit nr.01/33 të datës 29.08.2008 dhe me hyrjen në fuqi të këtij vendimi, gjykata vlerëson se janë plotësuar kushtet dhe kriteret sipas mënyrave të përcaktuara të licencimit dhe se në bazë të këtyre kriterëve mësimdhënësve u takon kompensimi

nga marrëdhënia e punës. Në këtë rast paditëseve në bazë të shkallës së licencimit, për shkak se posedojnë diplomë të nivelit Bachelor iu ka takuar kompensimi nga paga bazë prej 27%. Në rastin konkret, gjykata gjeti se e paditura ka për detyrim, që paditësve t'i paguajë kompensimin mbi bazën e kualifikimit ose licencimit, konform detyrimeve që rrjedhin nga Vendimi i Qeverisë së Republikës së Kosovës, me nr.01/33, datë 29.08.2008, sipas shkallës apo nivelit të kualifikimit ose licencimit të përcaktuar në këtë vendim. Më konkretisht, nga lista e pagave të lëshuar nga Buxheti i Republikës së Kosovës rezulton se e paditura, në emër të kualifikimit apo licencimit në pagën bazë, paditësve G.R, S.G, N.K dhe S.K-O, iu ka paguar shumën prej 58.32 euro. Sipas pikës 4 nën pikës 2 të Vendimit nr.01/33 të datës 29.08.2008, paditësit përfitojnë ngritje prej 27% të pagës bazë, në emër të licencimit apo kualifikimit shumën prej 55.35 euro. Andaj, gjykata vendosi si në pikën nën II. III. IV. dhe V të dispozitivit të këtij aktgjykimi, duke e detyruar të paditurën që paditësve G.R, S.G, N.K dhe S.K-O, për çdo muaj nga data 24.07.2018, e deri me datën 31.12.2022 të iu paguaj shumën prej 55.35 euro për muaj, apo secilit paditës veç e veç shumën e përgjithshme prej 2,988.90.

Në rastin konkret, gjykata gjeti se e paditura ka për detyrim, që paditësit t'i paguajë kompensimin mbi bazën e kualifikimit ose licencimit, konform detyrimeve që rrjedhin nga Vendimi i Qeverisë së Republikës së Kosovës, me nr.01/33, datë 29.08.2008, sipas shkallës apo nivelit të kualifikimit ose licencimit të përcaktuar në këtë vendim.

Në këtë drejtim, gjykata po ashtu ka analizuar edhe rregullativën nënligjore, gjegjësisht Udhëzimin Administrativ Nr.5/2017 për Sistemin e Licencimit dhe Zhvillimit të Mësimdhënësve në Karrierë (tutje: UA) i datës 18.04.2017, në të cilin, në nenin 24 parashihen Detyrat dhe përgjegjësitë e Drejtorisë Komunale për Arsim, ku paragrafi 3 i këtij neni parashihet "*Siguron buxhetin për ZHP të gjithë mësimdhënësve në nivel komune*" dhe paragrafi 4 "*Zbaton Sistemin e financimit të gradimit të mësimdhënësve të lidhur me këtë UA*". Pra në bazë të këtyre dispozitave e paditura obligohet që të sigurojë buxhet të mjaftueshëm si dhe të zbatojë sistemin e financimit lidhur me licencimin e mësimdhënësve.

Sipas vlerësimit të kësaj gjykate baza juridike e parashkrimit të kërkesave në të holla në kontestet e marrëdhënies së punës është në nenin 87 të Ligjit të Punës, sipas të cilit "*Të gjitha kërkesat nga marrëdhënia e punës në para, parashkruhen brenda afatit prej tri (3) vitesh, nga dita e paraqitjes së kërkesës*". Prandaj edhe kërkesa për këtë periudhë kohore nuk është parashkruar pasi që padia është parashtruar me datë 27.07.2021, brenda afati ligjor.

Nga të lartcekurat, gjykata me rastin e vendosjes që ta aprovojë kërkesëpadinë e paditësve, jashtë seancës gjyqësore, është bazuar në dispozitën e nenit 398 të LPK-së, ku është përcaktuar se "*Kur gjykata, pasi t'i arrijë përgjigja në padi, konstaton se ndërmjet palëve nuk është kontestuese gjendja faktike, dhe se nuk ekzistojnë pengesa të tjera për dhënien e vendimit meritor, atëherë ajo, pa caktuar fare seancë gjyqësore, mund ta jep aktgjykimin me të cilën e pranon si të themeltë kërkesëpadinë*". Në këtë drejtim, gjykata nga shkresat e lëndës vërtetoi gjendjen faktike, pra faktin se paditësit janë në marrëdhënie pune tek e paditura dhe kërkesëpadinë e tyre e aprovoi pjesërisht pasi që është e bazuar në Kontratën Kolektive të Arsimit e Kosovës si dhe në Vendimin e Qeverisë nr.01/33, datë 29.08.2008, në këtë rast gjykata vendosi si në dispozitiv të këtij aktgjykimi.

Nga të lartcekurat, duke u mbështetur në dispozitat e nenit 87 të Ligjit të Punës, Udhëzimit Administrativ Nr.5/2017, Vendimit të Qeverisë së Republikës së Kosovës, me nr.01/33, nenit 398 të LPK-së gjykata vendosi si në dispozitiv të këtij aktgjykimi.

Vendimin mbi shpenzimet procedurale gjykata e mori në kuptim të nenit 452.2 të LPK-së, i cili përcakton se: *“Po që se paditësi vetëm pjesërisht ka sukses në procesin gjyqësor, atëherë gjykata mundet, duke marrë parasysh suksesin e arritur, të caktojë që secila palë t’i bartë shpenzimet e veta apo që njëra palë t’ia shpërblej tjetrës, dhe ndërhyrësit që i është bashkuar, pjesën proporcionale të shpenzimeve”*, në kuptim të kompensimit të shpenzimeve të palës gjyq fituese, duke vendosur që e paditura t’ia kompensojë paditësve shumën si në pikën VI të dispozitivit të këtij aktgjykimi, në shumën e përgjithshme prej 621.00 euro, dhe atë për përpilimin e padisë 520.00 euro si dhe për taksën gjyqësore 101.00 euro.

GJYKATA THEMELORE GJAKOVË – DEGA RAHOVEC
Departamenti i Përgjithshëm – Divizionin Civil
C.nr.754/2021, më datë 29.02.2024

Bashkëpunëtorja profesionale
Adelina Çmega

Gjyqtari
Avni Berisha

KESHILLË JURIDIKE: Kundër këtij aktgjykimi, pala e pakënaqur ka të drejtë ankese në afatin prej 7 ditëve pas ditës së pranimit të të njëjtit, Gjykatës së Apelit në Prishtinë, e nëpërmjet të kësaj gjykate.